

四庫全書

史部

欽定四庫全書

史部
江西通志卷一

詳校官監察御史_臣左周

檢討_臣德生覆勘

總校官知縣_臣楊懋珩

校對官編修_臣盧遂

謄錄監生_臣陸鼎

欽定四庫全書

江西通志卷一

星野

列宿分野其傳自古周禮保章爰辨星土兩戒山河
雲漢是取表裏升降辰躔毗輔

聖世隆平統一寰宇南條右紀維江之潯牛斗斯占人
文寶聚珠璧聯輝景慶共覩和豐瑞應庶徵揚詡天
寶物華今驗其語作星野志

二十八舍主十二州斗秉兼之所從來久矣吳楚之疆

候在熒惑占於鳥衡

史記天官書

張守節正義云熒惑鳥衡皆南方之星故吳楚之占候也

斗江湖牽牛婺女揚州翼軫荊州

同上

丙丁江淮海岱一曰丙楚戌吳越

漢書天文志

吳地斗分壑也今之會稽九江丹陽豫章廬江廣陵六安臨淮郡盡吳分也楚地翼軫之分壑也今之南郡

江夏零陵桂陽武陵長沙及漢中汝南郡盡楚分也

漢書地理志

自南斗十二度至須女七度為星紀於辰在丑吳越分

野屬揚州

費直說周易起斗十度

自張十七度至軫十一度為

鶉尾於辰在巳楚之分野屬荊州

費直起張十三度

魏太史

令陳卓及范蠡鬼谷張良諸葛亮譙周京房張衡並

云

晉書天文志

斗牽牛須女吳越揚州九江入斗一度廬江入斗六度

按晉地理志廬江郡有尋陽縣豫章入斗十度會稽入牛一度吳分會稽

立東陽郡其太末信安二縣地今半屬廣信府翼軫楚荊州江夏入翼十二

度

吳分江夏立武昌郡有柴桑縣

長沙入軫十六度

吳分長沙立安成郡晉以安成

屬荊州同上

貞觀中李淳風撰法象志因漢書十二次度数始以唐

之州縣配而一行以為天下山河之象存乎兩戒北

戒自三危積石負終南地絡之陰東及太華逾河並

雷首底柱王屋太行北抵常山之右乃東循塞垣至

藏貊朝鮮是謂北紀南戒自岷山嶓冢負地絡之陽
東及太華連商山熊耳外方桐柏自上洛南逾江漢
攜武當荆山至於衡陽乃東循嶺徼達東甌閩中是
謂南紀河源自北紀之首循雍州北徼達華陰而與
地絡相會並行而東至太行之曲分而東流與涇渭
濟瀆相為表裏謂之北河江源自南紀之首循梁州
南徼達華陽而與地絡相會並行而東及荆山之陽
分而東流與漢水淮瀆相為表裏謂之南河故於天

象則弘農分陝為兩河之會五服諸侯在焉自陝而西為秦涼北紀山河之曲為晉代南紀山河之曲為巴蜀皆負險用武之國也自陝而東三川中岳為成周西距外方大伾北至於濟南至於淮東達鉅野為宋鄭陳蔡河內及濟水之陽為鄘衛淮水之陰為申隨皆四戰用文之國也北紀之東至北河之北為邢趙南紀之東至南河之南為荆楚自北河下流南距岱山為三齊夾右碣石為北燕自南河下流北距岱

山為鄒魯南涉江淮為吳越皆負海之國貨殖之所阜也自河源循塞垣北東及海為戎翟自江源循嶺徼南東及海為蠻越觀兩河之象與雲漢之所始終而分野可知矣於易五月一陰生而雲漢潛萌于天稷之下進及井鉞間得坤維之氣陰始達於地上而雲漢上升始交於列宿七緯之氣通矣東井據北川上流故鶉首為秦蜀墟得兩戒山河之首雲漢達維右而漸升始居列宿上角觜

參伐皆直天關表而在河陰故實沈下流得大梁
距河稍遠涉陰亦深故其分野自漳濱卻負恒山
居北紀衆山之東南外接髦頭地皆河外陰國也
十月陰氣進踰乾維始上達於天雲漢至營室
東壁間升氣悉究與內規相接故自南正達於西正
得雲漢升氣為山河上流自北正達於東正
得雲漢降氣為山河下流俶訾在雲漢升降中
居水行正位故其分野當中州河濟間且王良閣道

由紫垣絕漢抵營室上帝離宮也內接成周河內皆
豕韋分十一月一陽生而雲漢漸降退及艮維始下
接於地至斗建間復與列舍氣通於易天地始交泰
象也踰析木津陰氣益降進及大辰升陽之氣究而
雲漢沉潛於東正之中故易雷出地曰豫龍出泉為
解皆房心象也星紀得雲漢下流百川歸焉析木為
雲漢末派山河極焉故其分野自南河下流窮南紀
之曲東南負海為星紀自北河末派窮北紀之曲東

北負海為析木負海者以其雲漢之陰也唯娵訾內
接紫宮在王畿河濟間降婁元枵與山河首尾相遠
鄰顓頊之墟故為中州負海之國也其地當南河之
北北河之南界以岱宗至于東海自鷄首踰河戒東
曰鶉火得重離正位軒轅之柢在焉其分野自河華
之交東接祝融之墟北負河南及漢蓋寒燠之所均
也自析木紀天漢而南曰大火得明堂升氣天市之
都在焉其分野自鉅野岱宗西至陳留北負河濟南

及淮皆和氣之所布也陽氣自明堂漸升達于龍角
曰壽星龍角謂之天關於易氣以陽決陰大象也升
陽進踰天關得純乾之位故鶉尾直建巳之月內列
太微為天庭其分野自南河以負海亦純陽地也壽
星在天關內故其分野在商亳西南淮水之陰北連
太室之東自陽城際之亦巽維地也夫雲漢自坤抵
艮為地紀北斗自乾攜巽為天綱其分野與帝車相
直皆五帝墟也究咸池之政而在乾維內者降婁也

故為少昊之墟叶北宮之政而在乾維外者娵訾也
故為顓頊之墟成攝提之政而在巽維內者壽星也
故為太昊之墟布太微之政而在巽維外者鶉尾也
故為烈山氏之墟得四海中承太階之政者軒轅也
故為有熊氏之墟木金得天地之微氣其神治於季
月水火得天地之章氣其神治於孟月故章道存乎
至微道存乎終皆陰陽變化之際也若微者沉潛而
不及章者高明而過亢皆非上帝之居也斗杓謂之

外廷陽精之所布也斗魁謂之會府陽精之所復也杓以治外故鶉尾為南方負海之國魁以治內故娵訾為中州四戰之國其餘列舍在雲漢之陰者八為負海之國在雲漢之陽者四為四戰之國降婁玄枵以負東海其神主於岱宗歲星位焉星紀鶉尾以負南海其神主於衡山熒惑位焉鶉首實沉以負西海其神主於華山太白位焉大梁析木以負北海其神主於恒山辰星位焉鶉火大火壽星豕韋為中州其

神主於嵩嶽鎮星位焉近代諸儒言星土者或以州或以國虞夏秦漢郡國廢置不同周之興也王畿千里及其衰也僅得河南七縣今天下一統而直以鶉火為周分則疆場舛矣七國之初天下地形雌韓而雄魏魏地西距高陵盡河東河內北固漳鄴東分梁宋至於汝南韓據全鄭之地南盡潁川南陽西達虢略距函谷固宜陽北連上地皆綿亘數州相錯如繡考雲漢山河之象多者或至十餘宿其後魏徙大梁

則西河合於東井秦拔宜陽而上黨入於與鬼方戰
國未滅時星家之言屢有明效今則同在畿甸之中
矣而或者猶據漢書地理志推之是守甘石遺術而
不知變通之數也

新唐書天文志

按河分兩戒之說元明以來精於測驗者往往譏
其疎謬通雅云星土分野隋唐之志為詳然自西

法圖成則兩戒之說荒唐矣

利瑪竇為兩圖一載中國當見之星一載

中國所未見者天河自井按尾箕虛垣萬方而分度界之真可決從古之疑一行兩戒之論辭若懸河

以今直之
皆妄臆耳

又云河漢以十月收二月見天下皆然
而嶺表臘月晴燠之夜仍見河漢總不收隱此從
古無人道破者愚謂一行此術不惟俯察地理若
指諸掌實與觀斗柄而知四時審中星以驗昏旦
同符天象之自然要未可廢而不錄也

斗牽牛星紀也初南斗九度餘千四十二秒十二太中
南斗二十四度終女四度自廬江九江負淮水南盡
臨淮廣陵至於東海又逾南河得漢丹陽會稽豫章

西濱彭蠡南涉越門近蒼梧南海逾嶺表自韶廣以
西珠崖以東為星紀之分也古吳越郡舒廬桐六蓼
及東南百越之國南斗在雲漢下流當淮海間為吳
分牽牛去南河澨遠自豫章近會稽南逾嶺徼為越
分翼軫鶉尾也初張十五度餘千七百九十五秒二
十二太中翼十二度終軫九度自房陵白帝而東盡
漢之南郡江夏東達廬江南郡濱彭蠡之西得長沙
武陵又逾南紀盡鬱林合浦之地自沅湘上流西達

黔安之左皆全楚之分

同上

江南道蓋古揚州南境漢丹陽會稽豫章廬江零陵桂陽等郡長沙國及牂牁江夏南郡地潤昇常蘇湖杭睦越明衢處婺溫台宣歙池洪江饒虔吉袁信撫福建汀漳為星紀分其名山衡廬茅蔣天目天台會稽四明括蒼縉雲金華大庾武夷其大川湘瀨沅澧浙江洞庭彭蠡太湖

新唐書地理志

北斗七星二曰璇法星主地其分為楚四曰權為時主

水其分為吳

宋史天文志

三台六星上台下星主荆揚

同上

天市垣二十二星在氐房心尾箕斗宮內東蕃十一星

六曰吳越西蕃十一星二曰楚

同上

北方南斗六星南星者魁星也北星杓也石申曰魁第

一主吳二會稽三丹陽四豫章五廬江六九江十二

國十六星在牛女南近九坎各分土居列國之象九

坎之東一星曰齊齊北二星曰趙趙北一星曰鄭鄭

北一星曰越越東二星曰周周東南北列二星曰秦
秦南二星曰代代西一星曰晉晉北一星曰韓韓北
一星曰魏魏西一星曰楚楚南一星曰燕有變動各
以其國占之陶隱居曰越星在婺女南楚一星在魏
西南

同上

按十二國中有越無吳此春秋越滅吳後所占也

五車五星次東南一星曰司空主填星楚分荊州主秦

粟

同上

按五車之占有楚而無吳越當在戰國楚滅越已後但既不主揚州則於豫章似無涉惟安成一郡晉屬荊州差可牽合耳

江南東西路蓋禹貢揚州之域當牽牛須女之分東限七閩西略夏口南抵大庾北際大江

宋史地理志

揚州北極出地三十三度

元時四海測景之所凡二十有七此揚州乃今揚州江都

縣地

吉州北極出地二十六度半

元史天文志

星分度斗二十六牽牛八須女十二翼十八軫十七星

部地名斗牽牛越須女吳

與高誘前注異

翼軫楚

淮南天文訓

牽牛流為揚州分為越國軫星散為荊州

春秋元命苞

蒙山以東至南江會稽震澤徐揚之州屬權星大別以

東至雷澤九江荊州屬衡星

春秋文耀鉤

兗豫屬上台荆揚屬下級

論語擬輔象

鄭司農

名衆

說星土以春秋傳曰參為晉星商主大火國

語曰歲之所在則我有周之分野之屬是也某謂大

界則曰九州州中諸國中之封域於星亦有分焉其

書亡矣堪輿雖有邵國所入度非古數也今其存可
言者十二次之分也星紀吳越也玄枵齊也娵訾衛
也降婁魯也大梁趙也實沈晉也鶉首秦也鶉火周
也鶉尾楚也壽星鄭也大火宋也析木燕也此分野
之妖祥主用客星彗孛之氣為象

鄭康成周禮注

自張十二度至軫六度謂之鶉尾之次立秋處暑居之
楚之分野自斗六度至須女二度謂之星紀之次大
雪冬至居之越之分野

蔡邕月令章句

布度定紀布州繫象雍屬魁冀屬樞兗青屬機徐揚屬
權荆屬衡梁屬開陽豫屬瑤光

張揖廣雅

此以九州屬北斗也星止七而州有九何也合青
於兗合揚於徐故七星可主九州也與宋史第二
主楚第四主吳說異

天有十二次地有九州以此九州當彼十二次周禮雖
云皆有分星不知其分孰分之也星紀在於東北吳
越實在東南魯衛東方諸侯遙屬戌亥之次又三家

分晉方始有趙而韓魏無分趙獨有之

此據鄭氏周禮注

漢

書地理志分郡國以配諸次其地分或多或少鶉首極多鶉火甚狹徒以相傳為說其源不可得而聞之或有災祥而為占者多得其效蓋古之聖哲有以度知非後人所能測也

孔穎達春秋正義

吳越在南齊魯在東今歲星或北或西不依國地所在者此古之受封之日歲星所在之辰國屬焉故也吳越二國同次者亦謂同年度受封故同次也

賈公彥周禮疏

熒惑主霍山揚州荊州交州又曰璇璣者謂北極星也
玉衡者謂斗九星也玉衡第四星主荊州常以五卯
日候之乙卯為南陽巳卯為零陵辛卯為桂陽癸卯
為長沙丁卯為武陵凡五郡第六星主揚州常以五
巳日候之乙巳為豫章辛巳為丹陽巳巳為廬江丁
巳為吳郡會稽癸巳為九江凡六郡

星經

按郭子章云江西本豫章郡當候以乙巳廣信玉
山舊屬會稽郡當候以丁巳安福舊屬長沙郡當

候以癸卯其說雖拘於地猶不失古法也

南斗牽牛星紀之次初斗十一度外末女七度內於分
為吳越於辰在且於野在揚自漢廬江九江負淮水
之南盡臨淮廣陵於東海入逾南海西濱彭蠡南至
南海南斗在雲漢之下流當淮海之間為吳分牽牛
去南河寢遠故其分野自古豫章東達古之會稽南
逾嶺徼為越分島夸蠻貊之人聲教所不洎者皆係
之其在中國之地廬舒濠和滁真揚楚泰通無為兩

浙之蘇秀湖杭常潤明越睦處溫台衢婺江南之江
寧饒信洪撫筠袁虔吉宣歙江池太平廣德南康興
國臨江建昌福建之漳泉汀南劍興化邵武廣南之
循梅潮惠廣端康封梧新恩春藤高竇雷化容白南
義瓊珠崖昌化萬安皆吳越之分也

于大古尺
文祕訣

九江入牛五度豫章入斗十度彭蠡入翼十五度

同上

按彭蠡入翼豈據張勃吳錄以彭蠡為洞庭耶姑
錄之

黃帝分星次斗十一度至婺女七度曰須女又曰星紀
於辰在丑於律為黃鍾斗建在子今吳越分野費直
分星次斗十度至女五度為星紀吳越分野屬揚州
蔡邕分星次斗六度至須女二度謂之星紀大雪冬
至居越之分野陳卓范蠡鬼谷張良諸葛亮譙周京
房張衡分星次斗牽牛須女吳越揚州九江入斗一
度豫章入斗十度唐一行所分星次南斗牽牛星紀
之次也丑初起斗九度中斗二十四度終女四度其

分野自廬江九江負淮水之南盡臨淮廣陵至于東
海又逾南河得漢丹陽會稽豫章郡西濱彭蠡南涉
越州盡東南百越之國皆星紀分也南斗在雲漢下
流殷淮海之間為吳分牽牛在河南浸遠故其分野
自豫章東達會稽南逾嶺徼為越分

范成大吳郡志
分野說

費直書十二篇以易卦配地域蔡邕月令章句以節氣
當國分及皇甫謐作帝王紀復以月律配入辰次言
之而事益支矣按邕之說豕韋之次立春驚蟄居之

衛之分野以至玄枵小寒大寒居之為齊之分若謚
之說星紀之次於辰為丑謂之赤奮若於律黃鍾斗
建在子吳越分野以至析木於辰為寅謂之攝提格
於律應鍾斗建在亥燕之分野此班鄭之說也鄭氏
律說黃鍾子之氣十一月建而辰在星紀應鍾亥之
氣十月所建而辰在析木班固歷志娵訾之初危十
六度為立春中營室十四度為驚蟄玄枵之初婺女
八度小寒中而危初為大寒二子蓋源乎此夫星紀

東北而吳越實東南降婁姬訾戌亥之位而魯衛實
在東北齊表東海而星且北秦處西陲而次乃南故
或以古受封之日歲星所在為說武王克商歲在鶉
火伶州鳩云歲之所在我周之分野則周屬鶉火晉
文即位歲受實沈董因所云實沈之虛晉人是居自
張十七至軫十一鶉尾楚分故魯襄二十八年歲淫
玄枵裨竈知楚子之死謂歲棄其次以害鳥帑周楚
惡之則鶉尾為楚矣自氏五至尾九大火宋分故魯

昭十七年星見火辰梓慎知宋鄭之火謂宋大辰之
虛皆火房也則大火為宋矣然春秋戰國地每遷變
三晉未分晉果何分秦拔西河魏當何屬周既東西
何都而直驅火陳滅於楚何自而入韓分前封後據
又豈得如康成之所謂同時而當星次哉古之國邑
不過百里何常而得專次況古萬國周千八百又豈
皆無受封之日而獨此十二國得當之乎秦乃周也
不曰周而以東洛為周唐都京兆二郡既入畿內而

說者尚謂秦分則是國易而地不易也吳楚齊晉春秋之末廣土所至一時配入而不知疆域雜亂之不可要也夫風俗之所以異以廣谷大川之異制也州郡雖改山川不移閩浙五嶺本自兩越荆揚徐梁正爾三楚亦何得以是制哉此一行所以惟取七宿之中分四象之中位自上元之首以度為紀據山河以分其野然亦未之盡也苟以封日則有絕而復續者或以姬而繼子封日既異前人又非而前星且不變

耶禹貢無言保章之說惟不得而執也雖然豕韋禍
蔡大梁凶楚玄枵見饑乎宋鄭星紀定占於吳越永
嘉中歲白熒惑聚牛女間時謂吳越當有興王未幾
元帝登位故史臣謂星斗是祥苻堅會謀南寇石越
對以歲鎮斗牛福德所在而苻融亦以吳越為不可
伐蓋有不可誣者歲之所在為福所衝為災故師曠
梓慎裨竈有得而言天道在西北而晉不害在越而
吳不利皆以歲言之也吳越同分而史墨以為越得

歲吳不應伐是又不可曉者前哲之言蓋亦自有所有見而不必牽乎此餘如未然要以九州之分為正

羅泌

星野說

天有三垣紫微太微天市是也紫微太微皆將相輔佐之位而天市下垣則列國星宿之所在其星東西二十有二宋南海燕東海徐吳越齊中山趙九河魏韓楚梁巴蜀秦鄭河中河間晉周曰分野者指列星所屬之分而言鄭氏謂星所主土是也其國在此而星

則在彼彼此若不相配而其為象未嘗不相屬非地之在北者其分野在天亦居北地之在南者其分野在天亦居南也

蘇伯衡論分野

南昌瑞州饒州臨江袁州

皆吳地

廣信撫州建昌贛州南

安禹貢揚州之域星紀斗分南康

揚之西陸吳頭楚尾

九江

吳地

吉安

吳楚之境

禹貢荆揚二州之域星紀斗分

清類天文分野之書

南昌饒州廣信南康建昌撫州臨江吉安瑞州袁州贛

州南安天文斗分野九江天文斗牛分野

明一統志

斗六星二十五度吳之分野應天鳳陽蘇州松江常州

鎮江廬州安慶太平寧國池州徽州和州滁州杭州

廣德州處州南昌縣八州饒州縣七廣信縣七南康縣四建昌

縣五撫州縣六臨江縣四吉安縣九瑞州縣三袁州縣四贛州縣十二

南安縣四牛六星七度吳之分野揚州淮安湖州温州

九江縣五
章世純星次分野

明輿地圖以方格限里數查自順天府至應天府今江寧府

二千二百里至杭州府二千七百里至南昌府三千

里至廣州府四千八百里因前後北極出地差度乃
求每度應里數若干如應天府較京師差八度南昌
差十一度以二百七十二里推一度杭州差十度用
二百七十里廣州差十七度用二百八十二里所推
里數略不合者或測極高未必確而查豎晷無景亦
未必定故止以二百五十小里約計之可也若折中
多寡以二百七十里論當得九萬七千二百為地球
一周之里數置零數不用尚有九萬餘里

李天經渾
天儀說

地球用法其經緯皆異者任令一處居頂而從此下高
弧至地平使之南北游移以正交其彼處為度乃識
交度與頂之中弧化為里則得二處直相距之里數
又復識本高弧交地平度因以得彼處較前處所居
之方位若經同而緯異即先移其處同居子午圈下
以本圈上度識二處各距赤道若干度以之相減乃
得其相距度因以化為里如順天府與南昌府約在
同經試於子午圈上得南昌北距赤道二十八度順

天距四十度相差十二度化得三千六百餘里設一處在赤道內一處在赤道外各以所得數相加即其相距度乃因以化為里若緯同而經異即先各以其處移至子午圈下從鶯島圈線起至子午圈下止赤道算各經度以之相減即得二處經度差但距赤道內外遠近者依赤道平行小圈似不能如前法求里數蓋小圈所應一度之里較本赤道度相應者不等因而度小里數亦應少今惟於球上用高弧乃有

一簡即得者何也以一處居頂安高弧使從他處過則止視高弧上交點與頂之間弧即其相距度因復

算得里數如前

同上

揚州管斗吳之分野兼得楚及南越之交

杜佑通典

晉張華雷煥見斗牛間紫氣求之得寶劍於豐城故王子安滕王閣詩序云物華天寶龍光射牛斗之墟吳分也又云星分翼軫地接衡廬玉海云天關翼軫之疆地振江湖之國則以其近於楚分也而或者以子

安為誤誤矣於次為星紀為鶉尾

郭子章豫章書

豫章之地春秋時以為楚之東境據天文則吳之分野

涂廩續
豫章記

按史記楚世家昭王十二年吳伐楚取番正義括
地志云饒州鄱陽縣春秋時為楚東境秦為番縣
是則江西郡縣春秋二百年本屬楚至魯定公時
始為吳有耳

一統志豫章十三郡皆禹貢揚州之域而凡江南康則

地兼乎荆天文斗分野而九江則宿兼乎牛考牛宿
本位居丑之次為吳越揚州之分六星凡七度此王
勃所謂斗牛之墟者乎然斗二十五度所分野之地
週數千餘里躔度次合宜有鑒然不爽者考之天文
諸書以及各郡舊志類皆沿習異同不能分晰各度
乃蒐求遺書獲殘卷一帙二十八宿分野之圖說僅
存云斗六星二十五度為吳之分野南昌入斗八度
饒州廣信同居七度瑞州三度建昌五度撫州六度

吉安九度贛州十二度南康臨江袁州南安俱斗四度而九江則入牛五度雖分郡甚晰然與九江入斗一度豫章入斗十度從前諸家又相徑庭矣豈氣數遷移古今懸隔不相符合一至此乎

江西志論

南昌府故禹貢揚州之域春秋時地名豫章屬吳於辰則且於次則星紀於宿則斗牛女晉志云豫章郡入斗十度考晉張華問斗牛之間何為有異氣雷煥對以寶劍之精當在豫章豐城宋黃庭堅曰勾吳之區

維斗所直是斗十度正本府之分野

南昌府志

按南昌各府志略於星野撫州廣信援引稍詳吉安贛州則并此門類而去之故就諸縣志中說有根據者間採一二條以補其闕

豫章南斗牛北宿邈不相臨而星野相應古今不爽何歟賈公彥謂受封之始歲星所在遂為分野鄭夾漈謂諸國分星命以主祭二說今並存之論者謂天體圓蓋列宿精光南北相射信矣亦不盡然惟僧一

行以雲漢始終表裏江河分兩戒四維用以紀綱州
郡其說極為精透蓋謂星紀當雲漢下流百川歸焉
故其分野自南河下流窮南紀之曲東南負海為星
紀則吳越適相值今按豫章入斗十度值星紀之次
觀星分野自當以雲漢之說為宗至於五星三台紫
微垣天市垣之星各有分應圖經所載從來久矣

楊周

憲新
建志

天文圖斗六星二十五度吳之分野南昌與馬則豫章

主斗無疑矣以豫章近婺州專應牛宿者臆也

章北
瑞進

賢志
辨

瑞州古豫章郡地晉天文志及清類天文分野書並云
豫章入斗十度乃舊志稱入斗十三度終十四度此
猶不甚相遠及按唐天文志則云豫章訖會稽南逾
嶺微為越分夫越屬牛度而牽牛去南河寢遠則瑞
安見其果屬斗分耶且按晉書隆安四年太陰犯牽
牛而是年豫章水災則屬牛似乎有驗人云南斗二

十五度每一星得四度一分分之六有奇豫章起斗
十二度六分終十六度六分有奇以地理分之每百
里得九分之一有奇諸郡居瑞之首者三百六十
餘里繼瑞之尾者一千二百七十餘里然則瑞之分
野豈非起南斗十三度四分終十四度四分有奇也
哉

瑞州府志

瑞志分野屬斗固矣乃入度之淺深有岐說焉至別考
占候家言又謂麗牛有徵何哉因思子安滕王閣詩

序首言星分翼軫後人多譏其誤謂是少年馳騁之
文不暇詳核及考呂覽諸書吳楚之分其星翼軫彼
蓋先舉衡廬大勢言也孰謂王生誤哉

按勃精於推步歷算嘗作

千歲歷序中明言星分謂吳楚異宿也後人目誤解耳

下稱斗牛之墟則較然

矣

同上

省志江右皆斗分野當屬吳境而袁志載斗六度至須
女二度謂之星紀吳越分野又南斗牽牛星紀之次
則萬載分野約在斗牛二星間筠志引晉隆安水災

其麗牛有驗萬故筠轄當不甚相遠也

袁州府萬載縣志

臨江為禹貢揚州之域按漢地理志晉天文志當星紀之次南斗之度

臨江府志

攷春秋正義曰三家分晉方始有趙而韓魏無分二國且不得分昂畢之度安成一縣耳又何必因荆揚二字遽分斗軫丑巳哉蓋廬陵與安成接壤地分天次恐不應若是遼絕也安成既應南斗之占

梁大同五年皆出南

斗陳天嘉四年太白入南斗皆應安成郡則分野當在揚州之域

吉安府廬陵縣

志

星辰之遠度數之微其是非之較吾不能齊也乃若其地則為吳也舊矣故吾從入斗者焉十二辰次各得

天度三十度三十分之十四無贏縮也

按皇甫謐世紀四方之度

大有贏縮

今考星紀度數漢志引黃帝分星次起斗十一

度至女七度蔡邕起斗六度至女二度皆得二十九度費直起斗十度至女五度晉志起斗十二度至女七度唐書起斗九度至女四度皆得二十八度是星

紀不得與諸辰均矣晉志以豫章入斗十度廬江斗
六度九江斗一度而星紀之次乃起斗十二度則星
紀析木各得斗度之半豫章與九江廬江皆不得居
星紀當入析木之津矣惟元郭守敬起斗三度七十
六分八十五秒終女二度六分三十八秒則斗牛正
在星紀之次吳越亦當斗牛之分而各辰度數皆均
庶幾近之諸家星紀之度皆不足三十其分野數千
里約二百里不能當一度九江豫章相距二百里而

遙而遂差九度則盡星紀之野雖百度不給也且界以彭蠡則九江濱湖北豫章濱湖南經以江漢則九江在江南廬江在江北九江一度豫章十度乃自北而入南而廬江六度又自南而入北則星宿亂矣安所取衷哉鄭注謂堪輿雖有郡國所入度非古數者其是之謂夫南斗二十五度其星六其四主豫章一星得四度有奇以乘豫章千里之疆約二百餘里而差一度臨汝南豫章二百里豫章入斗十度則撫亦

將入十一度矣

撫州府舊志

文昌在北斗之首斗魁戴匡六星曰文昌宮文耀鉤曰天之六府孝經援神契曰文精所聚揚天紀輔弼並居以成天象故曰文昌宮也淳熙志臨川有文昌堰

上值文昌星不知何所本

按文昌堰之應文昌宮猶南安天柱峰之應紫微垣

進賢縣之應進賢星也其說皆鑿

宋宇家坤翁云上通辰次各著分野者

諸州之所同上通天垣正應文昌者吾郡之所獨又引漢志元始元年九月有流星出文昌貫紫宮在斗

西北子亥間如環以為文昌亦當在子亥間與巳午
相值巳午東南也巳午之維廣矣而云獨值吾州者
若失之固然猶有說焉譬之日色圓照九垓而其精
光正射影於土圭凝於陽燧者僅如珠如芥豈昔有
精天文者常命之耶然無所考矣

同上

府志援引諸家辨析雖詳卒無確見然俱就西江全地
考據異同非專為一撫州辨也聞西士南懷仁云豫
章入斗七度軫翼非也又據游子六推建昌新城應

在斗五度則撫屬諸縣應在斗六度矣

周旋東鄉
縣志論

建昌星野在斗正德志據晉史州郡躔次豫章入斗十
度嘉靖志又據撫州志云去豫章二百里將入十一
度今按南城去豫章三百餘里其入十一度比之撫
州似尤可據

建昌府志

諸說皆以信為揚州吳越境分野當在斗牛間蓋凡之
也周禮保章氏以星辨九州鄭康成注星紀吳越一
星紀耳而吳越代有廣狹况鄭所指乃春秋之勾吳

於越已邈於保章氏所分而一行所論吳越分野又
邈於春秋數倍將誰是乎惟晉志州郡躔次始分度
明初龔數輩之說為加詳及攷章大力星次分野畫
圖列地分星繫歌仰觀俯察瞭如指掌攷其所本乃
得之湯羅二西士則與今靈臺司厯者其學合矣

廣信

府志

明初舉龔數及王本杜佑著分野書分星於土分土於
度分度於數獨詳其說以九州在日月之下南屬日

北屬月經以二十八宿積數七百八十三星視其土
之廣狹分屬一宿一宿所屬或一省或兼省郡得宿
之度而分居縣又分其度之數或半數一數以至四
五數數分鉛為光澤崇安北界北接上饒弋陽入南
斗八之頭九之尾三分數之間星紀之次於辰在丑
於數建星於干支丙戌於疆域為揚之南越分神亦
帝赤熒怒主之

同上

饒占揚州吳國之境考索通考諸書云北斗則揚徐主

權饒則揚五星則歲星主齊吳饒則吳二十八宿則
斗牛女星紀之次為吳越揚州之分野饒則吳越揚
州晉書云自南斗十二度至女七度為星紀吳越之
分野屬揚州饒在焉或云九江入斗一度豫章入斗
十度饒界於中非精天文者莫之分然總以斗為據
云 饒州府志

九江入斗一度豫章入斗十度南康為江右名郡星子
原隸江州建昌安義隸豫章其地界於豫章九江之

間則宿在斗分此分野之正也

南康府分野圖說

廬山於天文為星紀之次其辰在丑斗牛分野

廬山志

晉志自南斗十二度至須女七度為星紀於辰在丑國
則吳楚州則維揚又析斗女分豫章入斗十度九江
入斗一度今考劉青田分野細數九江南康廣信三
府俱屬斗二十度而入斗一度者乃江寧揚州二府
並存之以俟知推步者

九江府志

班固地理志以斗牛為吳分野九江屬焉瑞昌九江屬

邑相去不數十里星野將安辨之嘗考蘇軾辰次圖以南斗十度為吳之頭以軫十度為楚之尾費直星厯南斗之十度屬豫章軫之十一度屬武昌武昌楚之尾也接壤武昌星厯辰次似宜為軫不為斗今有精甘石之術者其必能辨於此

武昌縣志

邑西聯郴桂郴桂古長沙郡去斗分遠矣

林際春崇義副志

今之言天事者動曰星野星則據北斗七星謂蒙山以東至南江會稽震澤徐揚之州屬權星大別以東雷

澤九江荊州屬衡星野則據二十八宿班孟堅云楚地翼軫之分壅吳地斗分壅粵地牽牛婺女之分壅也後人祖其說實不可據周天三百六十度大地全體九萬里應之上天一度下地二百五十里確有定所不能移動南自瓊州北極出地一十八度北至開平等處北極出地四十二度從南涉北共得二十四度徑六千里在大地全體不過十五分之一耳豈有穹窿圓象端為六千里而設哉且南北分地亦不相

符僧一行以天漢分南北近又有以圖書數位說之者體則陽不變而陰變用則陰不變而陽變皆臆度而不足徵然則保章氏以星土辨九州之地所封封域皆有分星以觀妖祥盡皆謬歟是蓋未詳所封二字之義也善乎賈公彥之疏可以解從來之惑矣考廣州府北極出地二十三度半南昌府北極出地二十九度崇義介在豫章東粵之交由縣治至庾關僅

一百五十里故其風氣略與粵同

劉凝崇義縣志彙本

江西禹貢揚州之域天文斗分野於辰則且於次則星紀於宿則斗牛女按揚州之域不止一江右今之江南浙江亦斗分閩廣亦牛女分江西界四省之間而並麗此三星作統志者所列分星於義當矣贛州者江西十三郡之一耳十三郡之分星皆同贛州何以獨得居之舊志引魏太史令陳卓言郡國所入宿度豫章入斗十度贛隸豫章則贛之宿度豫章已統之矣可以不載今之豫章專指洪州贛去洪千有餘里

所入之宿度宜不無參差則愈不必載鯁生不敢談
天闕之可也

贛州府志凡例

王子充有言分野視分星古不謂地也地有彼此之不
齊而分野在天則一定而不易是故吳星紀也而入
斗牛宿度豫章地固入斗然吳地南而星紀北以言
乎斗又為經星運動不居者豈非彼此不相配之說
乎然則如子充言揚州之有豫章豫章之有雩都非
以地之偏全大小析星之度數分毫如星家史氏言

也蓋合星紀斗度而主吳則合星紀斗度而主豫章
主雩都矣安見雩都之小不足應星紀斗宿之全度
哉彼匹夫匹婦精誠所感干於天象沉一邑乎

雩都縣志

論

豫章與閩禹貢皆揚州域贛州春秋屬吳越戰國屬楚
今獨以斗為豫章十二郡之分野閩八郡則牛女分
野豈周禮注言斗牛吳越漢書言牛女揚州皆統言
之歟抑天星分配以時而變歟今以地論之瑞去贛

三百餘里去汀僅八十里星土之交瑞似於斗頗遠
於牛女差近然則瑞當介斗牛之間理或然乎

瑞金
縣續

志

星之與土以氣相屬而不繫於方隅僧一行之言也靈
豁入理自足壓諸家之說按賴古揚州吳越地又屬
楚人為豫章屬縣故星次宜隨之石入賴屬邑也斗
牛既為賴之分星則亦石之分星也然於宿未開其
有專直政使有專直而一宿中星躔度數必且豆剖

瓜分務得江以西者又得贛者贛屬十二邑中之石
城者譬不異以髮屬心鬚屬腎遂一鬚必求一鬚之
水源於腎一髮必求一髮之火種於心也微乎微難
之矣天事渺茫寸寸而量之母乃以精鑿而反失之
乎盡信書者毋輒引斗牛間寶氣決其在豐城之類
者用相橫折也

郭堯京石城縣志論

已上次舍麗屬占步立說各異備錄以俟考蓋從
來星野之說有二一主地之方位一主星之光氣

主地似乎有憑實失之固考鄭注析木寅津幽燕
分也而與星紀斗牛相聯東魯為降婁中州之宋
為大火反隔一舍其不主地位明矣或者乃以瑞
昌接壤武昌宜為軫不為斗崇義西連郴桂瑞金
地近汀州皆去斗為遠甚至強配道里於一度中
又分細數不幾欲密而反疎乎以氣相屬不繫方
隅其說源於張衡王充暢於一行理較當矣昔人
猶以星紀北而吳越南未能破疑試思斗牛雖屬

北方之宿而四時運行非若北辰之居所不移也
況星紀舍中農大人主稼穡織女主女功匏瓜主
果食宇內同占曷嘗限以南北哉詳核天文志及
星經豫章於次為星紀於辰為丑於星宿為斗牛
此為定義其麗屬而有時占及者北斗第四權星
第五衡星第六開陽星上台之下星天市垣東蕃
第六星西蕃第二星十二國之越星楚星五車之
司空星於五曜主熒惑及歲星義各有指要於有

驗故歷代所占豫章應斗者什之五六應牛者什之二三翼軫無之觀古可以知今不當以豫章地曾入楚強附鷄尾次舍矣博雅君子宜有擇焉

風氣和平無瘴氛毒厲之虞無大水旱蟄蝗不至故歲常順成人足衣食惟切連閭嶠山谷四合磅礴積之氣涌洩奮溢陰潤恒多溫冷不常歲春三月多雨寒氣至二月漸退晨霧則晴晴則煖雨則寒綿衣單袂早晚異宜清明時多疾風暴雨四月梅雨蒸溽俗

稱爛梅天亦作霉地磚石礎皆潤五月多雨川谷驟
漲俗呼端午水夏至後九日中必有驟雨或連日雨
俗呼夏九節至是始可御締綌六月炎烈少雨七月
熱益燥八月猶熱或連雨陰晦亦復蒸濕稱木樨霉
十三日至二十三日俗稱詹天家或謂蒹葭之誤近
九月始涼亦多風雨十月多晴氣煖如春爾雅疏云
十月曰陽月俗稱小陽春可種花木間有霜三冬積
數霜至一旬餘或二旬民喜預卜有年十一月十二

月或雪或薄冰益喜自五月盡至十月早晚諸稻隨
時登收一歲間附郭早稻或再收茶或三收芋或四
收牡丹芍藥開放先中州一月菊後一月冬或久晴
桃李花開不為異大抵暖多寒少氣洩鮮凝故人稟
殊薄云

宋李觀論時江氣候

星野有遠近則四時之氣有遲速武寧處豫章西北四
山盤結勢趨彭蠡氣候較江南平原為異歲多風春
東風雨夏北風雨秋西風雨冬東風則雪夏蛟出則

電四月後梅雨鬱蒸尚宜重綿五六月驟雨時行秋
初熟尤甚多防旱八九月嵐氣多人易患瘧冬水不
堅諸種宜豫秋社下麥春社下稼麥遲則凌寒稼遲
則苦旱亦地多高亢使然也俗傳春盡有黃丹瘴則
損麥夏盡有乾風起則損稼日出而雨則生蟲春秋
二仲多陰翳謂之弄寒弄暖

馮其世論武寧氣候

按南昌省會所在舊志不言氣候寧邑所志風雨
寒煖大略相似故錄之袁近楚信近浙饒九近江

南風氣大同小異而五老康王夏可挾纊桑落封
郭旱乃豐收所謂廣谷大川異制也南贛介粵嶺
之北恒燠少雪地氣所囿天氣從之轉移視省會
蓋懸絕矣

環郡峰巒不甚開展地逼揚越天氣近之雨暘寒燠之
類較之中土不倫每歲正月雨水以後陰霾日多晴

霽日少

俗云春無
三日晴

季春雨輒雷電時有烈風三四月

暴雨時作亦以晴雨占歲

俗云清明穀雨小滿芒種
四月八日五月五日分晴

雨占歲
餘儉

夏至後少雨

俗云夏雨不過籬

冬深陰雨靈靈斷而

復續雲封山巔旬日不解此一歲雨暘之大槩也

大庚

三縣同崇義陰雨稍異

芒種以後日迫於暑四月蒸鬱為甚三

伏炎酷入秋彌烈八九月間多霧霾曉起山峰莫辨

霜降立冬之交天氣始肅十月微有霜三冬不甚寒

雪霰歲或一二作池水有凝凍者得日隨解若瘴癘

則城郭為少山谷有之

俗傳二三月謂之青草瘴五六月謂之黃茆瘴九十月謂

之新米瘴

立冬後漸止大都氣候不齊未至如嶺外常暄

然而和煦偏多輕絹單衣冬不盡藏也

陳奐稽志
南安氣候

以中州言之贛在東南以江右言之贛在正南故贛地
常燠嶺南之人呼過雲雨為天笑六月多有故人曰
火雨贛人亦呼過雲雨言其不能久也而所謂天笑
必靈雨乍止若將有晴乃為天笑天笑則不晴諺曰
天笑人愁春冬及初夏往往有之立夏逢庚入梅芒
種逢壬出梅與閩俗同秋霜遲冬冰薄雪霜不過一
二日土人謂霜盛曰霜熟雪盛曰雪熟以為豐年之

兆也通雅小春月三雨則百蟲飲而藏蟄賴近粵晴
煖則蜂虻常出月令季冬雁北嚮賴則在二月月令
二月桃始華賴不待二月月令小暑至螳螂生賴季
春即有之月令八月乃勸種麥賴以九月獨夏小正
正月梅杏桃則華九月樹麥此其與月令不同而與
賴同也地無周時之風或發於凌晨迨昏而止或發
於午後來朝而止少止復發亦于喁旬日但無子亥
周徧者故鮮嚴寒而冰不壯

張尚瑗志賴州氣候

記曰凡居民材必因天地寒煖燥濕廣谷大川異
制民生其間者異俗剛柔輕重遲速異齊修其教
不易其俗齊其政不易其宜是則風土氣候亦臨
民出治者之所宜亟知也故特附於星野之後據
所可徵者列數條而全省所轄袤廣千餘里彼此
遠近雖殊大約可推而得焉

江西通志卷一

欽定四庫全書

史部
江西通志卷二

詳校官監察御史_臣左周

檢討_臣德生覆勘

總校官知縣_臣楊懋珩

校對官編修_臣盧遂

謄錄監生_臣陸鼎

欽定四庫全書

江西通志卷二

沿革

聖皇撫馭統一寰輿薄海內外咸通象胥江西省會幸
列中區稽古禹貢維揚一隅於周南國為楚為吳豫
章立郡在漢之初唐宋元明建置紛如道路分隸軍
府兼除州縣改設地一名殊由今溯昔具在成書作
沿革志

江西省

淮海惟揚州

尚書禹貢

東南曰揚州

周禮職方氏

魯昭公六年楚令尹子蕩率師伐吳師於豫章 十三年楚師還自徐吳人敗諸豫章獲其五師 定公二年楚囊瓦伐吳師於豫章 四年吳人舍舟於淮汭自豫章與楚夾漢闔廬之弟夫槩王以其屬五千先擊子常之卒楚師亂吳師大敗之

春秋左氏傳

江水又東逕郢城南人東得豫章口

桑欽水經

豫章之名舊矣在江左者有其地而非郡在江南者
建郡而非春秋之時吳王闔閭七年魯定公之二年
也楚囊瓦伐吳師於豫章冬十月克楚取居巢又二
年吳將入郢其謀臣請因唐蔡而西冬十一月蔡侯
吳子唐侯俱舍舟于淮汭自豫章與楚夾漢囊瓦濟
漢而陳自小別而至大別吳逆擊敗之五戰而及郢
嘗觀吳都具區今平江之吳縣也楚都郢今富水也

漢水自歸峽接流而為今漢陽軍蓋視吳為東九江
自庾嶺兆源而洪州奠其南蓋視楚為西居巢今無
為軍也闔閭之六年吳人見舟于豫章而潛師于巢
以明豫章瀕楚而巢邇于吳故得而潛師也小別大
別今鄂州之山漢水視之為東者也九年吳人舍淮
汭而即豫章杜氏以為漢東江北地囊瓦方且濟漢
而陳于小大之別則春秋之豫章為瀕楚在江夏之
間審矣或者以七年之師因豫章以見舟則其地必

沿流之所而洪之為州蓋沿流者也九年舍舟而即
豫章且堅杜氏之說因以漢東之地為平陸惟有沿
流平陸之異故以見舟者江南豫章也殊不知吳視
楚為西視江夏為少西而視洪則南矣見舟所以張
軍容也安能遠託大江之南而不近趨少西之地然
則江南之豫章決無預乎春秋之時明矣予江西人
嘗考今之豫章非春秋之豫章然皆未得其定說已
具於前矣最後予讀杜預孔穎達注疏而後知予之

寡見也按左氏昭公十三年楚師還自徐吳人敗諸
豫章獲其五帥杜預注曰定公二年楚人伐吳師於
豫章吳人見舟于豫章而潛師于巢吳軍楚師于豫
章又柏舉之役吳人舍舟于淮汭而自豫章與楚夾
漢此皆當在江北淮水南蓋後徙在江南豫章又左
氏傳定公四年蔡侯吳子唐侯伐楚舍舟于淮汭自
豫章與楚夾漢杜預曰豫章漢東江北地名孔穎達
曰漢書地理志豫章郡名在江南此則在江北者土

地名云以上皆經傳與注疏所載予以杜孔注疏證
江南之豫章無與於春秋之豫章審矣漢志雖曰高
帝置但年代闊遠文字殘闕無從考見所徙之年月
耳按宋武帝討劉毅遣王鎮惡先襲至豫章口去江
陵城二十里乃知春秋之豫章去江陵甚近與今洪

州全不相干

能改齋漫錄

春秋屬吳地

十道志

戰國屬楚

太平寰宇記

周元王三年越滅吳

左氏傳

周顯王之四十六年楚威王興兵伐越大敗越殺王無

疆盡取故吳地

史記越世家注

按通鑑楚滅越在顯王三十五年與史記注互異

秦為九江郡

十道志

始皇二十三年王翦滅擊荊虜荊王負芻二十六年分

天下為三十六郡注九江郡其一也

史記秦始皇本紀

漢為豫章郡

十道志

雷次宗曰郡松陽門右有樟樹高七丈五尺大二十五圍枝葉扶疎蔭庇數畝漢官儀謂豫章生庭中故高帝取以名郡

高帝五年潁陰侯灌嬰渡江定豫章郡

漢書

豫章郡領縣十八南昌廬陵彭澤鄱陽歷陵餘汗柴桑

艾新淦贛南城建成宜春海昏雩都鄖陽南楚安平

漢書

地理

莽曰九江

同上

揚州刺史部豫章郡二十一城南昌建成新淦宜春廬陵贛雩都南竺南城鄱陽歷陵餘汗鄡陽彭澤柴桑艾海昏侯國平都侯國故安平石陽臨汝永元八年置建昌永元十六年分海昏置

後漢書郡國志

新吳上蔡永修縣並中平年立豫章縣建安年立

後漢書注

興平元年孫策分立廬陵郡

同上

建安中孫權據吳析南昌地置富城鍾陵宜豐三縣十五年別為鄱陽郡人割柴桑縣入武昌郡孫亮太平二

年立臨川郡孫皓寶鼎二年立安成郡

興地廣記

晉豫章郡統縣十六南昌海昏新淦建成望蔡永修建

昌吳平豫章彭澤艾康樂豐城新吳宜豐鍾陵臨川

郡統縣十臨汝西豐南城東興南豐永城宜黃安浦西

寧新建鄱陽郡統縣八廣晉鄱陽樂安餘汗鄡陽厯

陵葛陽晉興廬陵郡統縣十西昌高昌石陽巴邱南

野東昌遂興吉陽興平陽豐南康郡太康三年置統

縣五贛雩都平固南康揭陽

晉書志

惠帝元康元年有司奏荆揚二州疆土廣遠統理尤難於是割揚州之豫章鄱陽廬陵臨川南康建安晉安荊州之武昌桂陽安成合十郡因江水之名置江州永興元年分廬江之尋陽武昌之柴桑二縣置尋陽郡屬江州同上

懷帝永嘉元年又以豫章之彭澤縣屬尋陽郡

同上

雷次宗曰望氣者云豫章廣陵有天子氣故封愍懷太子為廣陵王領鎮軍以鎮豫章後永興中懷帝遂

以豫章王登天位

元帝渡江江州又置新蔡郡尋陽郡又置九江上甲二縣尋又省九江縣入尋陽

晉書志

歐陽忞曰應劭漢官儀云有豫章生於庭中故以名郡此木嘗中枯晉永嘉中一旦更茂其後元帝果興大業于江南故郭璞南郊賦云敝樟擢秀於祖邑以司馬宣王之祖嘗為豫章太守故也

五代齊江州鎮尋陽中流衿帶領尋陽郡豫章郡臨川

郡廬陵郡鄱陽郡安成郡南康郡永明八年罷安遠縣

并虔化

南齊書州郡志

隋開皇元年平陳置洪州總管府改鄱陽為饒州罷南康郡為虔州大業三年復為郡改廬陵為吉州置江州總管大業三年罷為九江郡置袁州大業三年罷為宜

春郡改臨川為撫州大業三年復置郡

隋書志

唐初仍隋置洪州總管府武德五年平林士弘仍改都督府領洪吉虔饒撫南平六州分豫章置鍾陵南昌二

縣入豫章平蕭銑置袁州貞觀二年加洪饒撫吉虔袁
江鄂等八州安撫使李大亮宣慰江南即建成縣置靖
州七年改靖州為米州又改為筠州尋廢屬洪州上元
元年江淮轉運使元載奏置信州

太平寰宇記

江南道蓋古揚州南境

新唐書

開元二十一年分江南道為江南東道江南西道置采

訪處置使改江西觀察使

新唐書地理志

江南西道觀察理所管州八洪州饒州虔州吉州江州

袁州信州撫州管縣三十八洪州管縣七南昌高安新
吳豐城建昌武寧分寧 饒州管縣四鄱陽餘干樂平

浮梁

虔州管縣七贛縣南康信豐大庾雩都虔化安

遠

吉州管縣五廬陵安福永新太和新淦 江州管

縣三潯陽彭澤都昌

袁州管縣三宜春新喻萍鄉

信州管縣五上饒玉山弋陽永豐貴溪 撫州管縣四

臨川南城崇仁南豐

元和邵縣志

南唐洪州置鎮南軍顯德五年東都入於周以州建南

都撫州置昭武軍以東南境別置建武軍虔州置百勝

軍保大十年復置筠州

南唐書

宋置都督洪都豫章郡鎮南軍分江東西路建炎元年
以江寧府洪州並升帥府四年合江東西為江南路又
置鄂州路統鄂岳筠袁虔吉州南安軍江西路統江洪
撫信州興國南康臨江建昌軍淳化元年置南安軍紹
興初復分東西以饒州信州撫州建昌軍為江南東路
以江州洪州筠州袁州虔州吉州興國南康臨江南安

軍為江南西路尋以撫州建昌軍還隸東路

宋史志

元至元十二年設行都元帥府及安撫司十四年改元帥府為江西道置江西等處行中書省治隆興領十有八路置提刑按察司改肅政廉訪司改隆興府為龍興升富城縣為富州置寧州吉安路升吉水安福太和永新俱為州瑞州路升新昌縣為新昌州袁州路升萍鄉縣為萍鄉州改臨江軍為臨江路升新淦新喻為州改南康軍為南康路升建昌縣為建昌州改建昌軍為建

昌路贛州路升寧都會昌為州南安路升南豐縣為州

元史
志

明初壬寅陳友諒平仍襲元行中書省建行省于南昌

子城內洪武九年革中書省置承宣布政使司

嘉靖
林志

置江西等處承宣布政使司領十三府置江西都指揮使司領四衛十一守禦千戶所置江西等處提刑按察司並治南昌分為五道南昌府瑞州府屬南瑞道饒州府南康府九江府屬九江道廣信府撫州府建昌府屬

湖東道吉安府袁州府臨江府屬湖西道贛州府南安

府屬嶺北道

名勝志總叙

明初凡元升各州復改為縣領州一縣六十八至正德間增設四縣饒州府萬年南康府安義撫州府東鄉南安府崇義嘉靖間增設二縣廣信府興安臨江府峽江隆慶間增設一縣贛州府定南萬厯間增設二縣贛州府長寧建昌府瀘溪凡領縣七十七

皇清因之康熙二十一年裁各道惟分巡饒南九道贛

南道領州縣如故

癸亥安志

雍正九年以督糧道領轄南昌撫州建昌三府為督糧
兼巡南撫建道驛鹽道領轄瑞州袁州臨江三府為驛
鹽兼巡瑞袁臨道饒南九道增轄廣信一府為分巡廣
饒南九道贛南道增轄吉安一府為分巡吉南贛道

按歷代各府沿革或為國或為郡或為部或為都
督府或為州或為軍或為路或合或分統屬不一
具詳各府縣沿革如左

南昌府

春秋戰國屬楚秦屬九江郡漢高帝改為淮南國分置

豫章郡

輿地廣記

豫章以木氏都

風俗記

景帝三年改為漢郡東漢復為豫章郡

南昌府志

豫章郡統縣十六

晉書志

宋齊以後並為豫章郡

太平寰宇記

平陳置洪州總管府大業初廢復置郡

隋書志

洪州因洪厓井為名

元和郡縣志

武德五年置洪都總管府天寶元年改豫章郡

唐書志

唐天寶初改豫章郡後以避代宗諱只稱章郡

郡縣釋名

乾元元年復為洪州

唐書志

乾元二年置南昌軍元和六年廢

唐書注

建中四年陞江西道節度使咸通六年加號鎮南軍

勝名

志

周顯德六年南唐中主以建康與敵境隔江豫章據上

流秋七月升洪州為南昌建南都建隆二年至南都

馬令

南唐

書

太平興國元年分洪州屬江南西路隆興三年以孝宗

潛藩升為隆興府

宋史志

元改為隆興路又改龍興隸江西行中書省

元史志

明初改洪都府尋復為南昌府

續文獻通考

初領縣八南昌新建豐城進賢奉新靖安武寧寧縣弘

治十六年升寧縣復為寧州

嘉靖通志

皇清因之領州一縣七

安志

南昌縣

漢置附郭

寰宇通志

莽曰宜善

漢書

東漢復舊縣名建安中析置富城鍾陵宜豐縣晉省入

陳永定三年復析置西昌縣

南昌府志

隋平陳改為豫章縣

元和郡縣志

武德五年析置鍾陵縣又置南昌縣以南昌置孫州八

年州廢省南昌鍾陵

唐書注

寶應元年避代宗諱改豫章曰鍾陵貞元中又改曰南

昌

輿地廣記

宋元明仍舊

皇清因之編戶四百四十九里

安志

新建縣

宋太平興國六年析南昌縣置與南昌分治郭下

輿地廣記

本漢南昌縣地晉分置宜豐縣陳又分置西昌後俱省

宋太平興國六年割南昌之水西一十四鄉置今縣

名勝

志

本南昌縣西境取南昌舊地而新建之也

郡縣釋名

元明仍舊

皇清因之編戶一百十里

安志

豐城縣

本漢豫章郡南昌縣地三國分置富城縣

郡縣釋名

晉太康元年改名豐城雷煥得龍淵太阿于此

輿地廣記

隋開皇九年併豐城入廣豐縣初隸撫州後屬洪州

太平

寰宇

記

仁壽二年避煬帝諱復豐城

名勝志

唐天祐中朱全忠以父名城改豐城為吳皋後唐同光

元年復改吳皋為豐城

南昌府志

元至元二十三年升豐城為富州隸龍興路

元史志

明洪武二年復改為縣

豐城縣志

皇清因之編戶三百五十四里

安志

進賢縣

本漢南昌縣東境晉立鍾陵縣廢唐復析置鍾陵縣尋

改為進賢縣

寰宇通志

崇寧三年分南昌四鄉新建二鄉合本鎮改為縣仍曰

進賢

宋朝會要

或曰省城有進賢門相傳澹臺滅明南游從此而進即

進賢義或曰縣東有棲賢山

邵縣釋名

元明仍舊

皇清因之編戶一百九十八里

安志

奉新縣

漢高帝平定海內分徙江東大族置之他郡於是遷塗山氏於此號曰新吳以舊隸楚今新屬吳也

名勝志

新吳縣靈帝中平年立

後漢書注

隋開皇九年省入建昌

元和郡縣志

唐高宗永淳二年復置新吳縣僞唐割據江南改名奉

新

太平寰宇記

宋元明仍舊

皇清因之編戶一百五十一里

安志

靖安縣

本建昌縣地唐廣明之後草寇侵掠本州以靖安孝悌
兩鄉去州稍遠乃於此置鎮至僞吳乾貞二年升為場
唐昇元中改為縣仍析建昌奉新武寧三縣地以益焉

太平寰

宇記

靖安里名因里名鄉因鄉名鎮因鎮名場因場名縣

郡縣

名釋

元明仍舊

皇清因之編戶二十里

安志

武寧縣

古西安縣也後漢建安中分海昏縣立西安縣至晉太康元年改為豫寧王僧綽封豫寧侯即此縣陳立豫寧

郡

太平寰宇記

隋廢郡以豫寧併入建昌隸洪州唐長安四年分建昌

置武寧景雲初改豫寧寶應元年避代宗諱復為武寧

名勝志

宋屬隆興府

弘治縣志

至元二十三年置寧州縣為倚郭大德八年於分寧縣

置寧州武寧直隸本路

元史志

明仍其舊

皇清因之編戶五十一里

安志

寧州

豫章郡領艾縣注云莽曰治翰

漢書地理志

漢艾縣豫章郡所領晉分置永修縣以修水為名隋省入建昌唐析建昌置武寧縣貞元中又分武寧置分寧

縣

名勝志

以縣分自武寧故名分寧古艾地也

宋郡縣志

隆興分寧縣北有艾城春秋吳公子慶忌居之

郡縣釋名

至元二十三年於武寧縣置寧州領武寧分寧二縣大

德八年割武寧直隸本路徙州治於分寧

元史志

洪武初改寧州為寧縣弘治十六年從巡撫林俊請復

改為寧州

嘉靖林志

皇清因之編戶八十六里

安志

瑞州府

春秋屬吳戰國屬楚秦屬九江郡

寰宇通志

今州城即漢之建成縣屬豫章郡

太平寰宇記

莽曰多聚

漢書

漢中平中析建成置上蔡縣徙汝南上蔡人居之晉太

康元年以上蔡人思歸改名望蔡由漢迄隋析合廢置
不同皆屬豫章郡

瑞州府志

武德五年改為高安仍置靖州統高安望蔡宜豐陽樂
華陽五縣七年改靖州為米州其年又改為筠州八年
廢筠州省華陽望蔡二縣以高安屬洪州

唐書志

按豫章書及府志云請改建成為高安則安撫使
李大亮也奏改米州為筠州則江南道都督鮑安
仁也奏廢筠州省縣入高安屬洪州則安撫使韋

繼武也

唐末其地屬淮南

瑞州府志

保大十年春正月分洪州高安縣置筠州割萬載清江

上高屬焉

馬令南唐書

自唐以前地理與洪州同

輿地廣記

開寶八年割萬載縣隸袁州

瑞州府志

紹興十三年改高安郡寶慶元年避理宗諱改今名

宋史

志

郡治碧落堂後產瑞芝一本太守沈謚作頌表奏于朝

詔改為瑞州因號瑞陽

瑞州府志

元至元十四年升瑞州路

元史志

明改為瑞州府領縣三

嘉靖林志

皇清因之

安志

高安縣

漢高帝六年置隸豫章以其創建城邑故曰建城後漢

靈帝析建城置上蔡縣

雷次宗豫章記

孫吳增置陽樂宜豐二縣晉武帝太康元年改為望蔡
又改陽樂曰康樂隋開皇中廢望蔡康樂宜豐三縣入

建城

太平寰宇記

武德五年改為高安仍于縣置靖州八年廢州復為縣

元和郡

縣志

南唐保大十年分高安置上高

瑞州府志

形地似高而實安故名

郡縣釋名

宋元明仍舊

皇清因之編戶二百九十里

安志

上高縣

本高安之上高鎮以地形高上得名

太平寰宇記

靈帝時分建成置上蔡縣晉改為望蔡唐武德中併入

高安僖宗朝鍾傳始建上高鎮於此

顧野王輿地志

五代時置屬洪州南唐來屬筠州

輿地廣記

南唐保大置縣因鎮名也

郡縣釋名

宋太平興國七年割宣風義鈞二鄉之半屬新昌縣

上高

縣志

元明仍舊

皇清因之編戶一百六十七里

安志

新昌縣

本漢建成縣地吳析置宜豐縣隋省入建成縣

豫章書

唐武德五年復置

輿地廣記

南唐以宜豐舊地為鹽步鎮宋以地廣勢險入於宜豐

故城置新昌縣

豫章書

太平興國六年析高安地置新昌縣

宋史志

割高安上高等地而新建縣故曰新昌

郡縣釋名

元貞元年升新昌縣為州

元史志

明仍以州為縣

皇清因之編戶一百二十三里

安志

袁州府

春秋屬吳楚之國秦為九江郡亦曰南楚

宋韓絳袁州郡廳記

漢為豫章郡之宜春縣

太平御覽

莽曰修曉

漢書

吳屬安成郡晉宋齊梁陳因之

輿地廣記

晉太康元年平吳改宜春為宜陽避太后諱仍屬安成

郡

太平寰宇記

平陳置袁州

隋書志

宜春舊曰宜陽開皇十一年廢吳平縣入十八年改名

焉大業初置郡

同上

武德四年平蕭銑置袁州天寶元年改為宜春郡乾元

元年復為袁州

唐書

開寶八年曹彬平江南得州十九袁居其一
是年割筠州萬載來屬雍熙元年析宜春縣立分宜縣淳化三年

割新喻縣屬臨江軍

袁州府志

至元十四年改總管府領縣四設錄事司隸湖南行省

十九年升袁州路隸江西行省

元史志

明以袁州路為袁州府領縣四

嘉靖通志

皇清因之

安志

宜春縣

本漢舊縣也屬豫章高帝六年灌嬰于此築城置宜春

縣

太平寰宇記

武帝封長沙定王子為宜春侯

漢書

按西漢縣名宜春者二一屬汝南郡一屬豫章郡
後漢時屬汝南加北宜春以別之

吳寶鼎二年以宜春屬安成郡晉太康元年以太后諱
改為宜陽縣隋開皇十八年改宜陽為宜春大業三年

罷袁州為宜春郡

太平寰宇記

縣側有煖泉隨地湧出夏冷冬煖瑩媚如春飲之宜人

故以名縣

名勝志

唐以後俱仍舊明因之

嘉靖通志

皇清因之編戶一百五十里

安志

分宜縣

本宜春縣地

輿地廣記

雍熙元年置分宜縣

府志

析宜春縣之神龍招賢等十鄉置分宜縣以便民欲當

宜春新喻兩縣界之中也

太平寰宇記

分宜縣以其地分自宜春也

郡縣釋名

元明仍舊

皇清因之編戶一百八十里

安志

萍鄉縣

吳置屬安成郡晉以後因之隋屬宜春郡唐因之

輿地廣記

相傳楚昭王渡江獲萍實於是邑故孫吳立縣取以為

名本漢宜春縣地

名勝志

地理志以萍為革

郡縣釋名

元貞元年升萍鄉州

元史志

洪武己酉改州仍為縣

嘉靖志

皇清因之編戶一百三十里

安志

萬載縣

本陽樂縣地吳黃武中置晉太康元年改為康樂屬豫章郡宋因之唐武德五年復置陽樂縣屬靖州八年州

廢省入高安

與地廣記

楊吳順義元年分高安四鄉置萬載場因其鄉以名其地南唐保大十年升高安縣為筠州遂升萬載場為縣以屬焉今割隸袁州

太平寰宇記

開寶末自筠州來屬宣和三年改名建成紹興元年復今名

宋史志

按宋徐昇萬載修縣記云萬載本高安故地初宜場隸于洪偽吳順義元年也復為縣隸於筠南唐

保大十年也皇朝下江南遂割屬袁州則開寶八年也宣和初改曰建城而復舊名則紹興元年詔也

元因之明設縣治仍稱萬載

嘉靖林志

皇清因之編戶一百四里

安志

臨江府

戰國屬楚秦屬九江郡

寰宇通志

漢志豫章郡十八縣新淦建成在焉三國志吳置安成

郡新喻隸焉今新淦新喻不改而建成至唐改為高安

即今之吉安也

名勝志

隋開皇九年改屬洪州新淦并入廬陵郡新喻廢入吳

平屬豫章十八年置袁州新喻屬袁州

臨江府志

唐武德五年改建成為高安置靖州七年人改筠州八

年廢隸洪州新淦屬吉州新喻仍屬袁州

同上

淳化三年以筠州之清江建臨江軍

宋史志

至元十三年隸江西行省都元帥府十四年改臨江路

總管府元貞元年新淦新喻二縣升為州

元史志

洪武元年改臨江路為臨江府領縣三

嘉靖通志

嘉靖五年析新淦之南置峽江縣即古石陽巴邱地領

縣四

臨江府志

皇清因之

安志

清江縣

本漢建成縣地

邵縣釋名

昇元元年陞吉州蕭灘鎮為清江縣不隸州

唐餘紀傳

五代時置屬洪州南唐屬筠州宋置臨江軍於此

輿地記

至元十四年升軍為路而縣為倚郭

元史志

明仍其舊

皇清因之編戶二百五十三里

安志

新淦縣

本漢舊縣豫章南部都尉所居縣有淦水因以為名

元和

郡縣志

莽曰偶亭

漢書

晉為新淦歷代不改陳屬巴山郡隋開皇十年廢以縣

屬吉州

太平寰宇記

唐為虔吉五州巡撫使治所五代時楊吳為都制置治

所宋初屬吉州

豫章書

淳化三年自吉州來隸

宋史志

元貞元年升為新淦州

元史志

明洪武二年新淦州復為縣嘉靖五年析新淦地置峽

江縣

新淦縣志

皇清因之編戶二百二十七里

安志

新喻縣

本漢宜春縣地屬豫章郡吳孫皓分宜春立新喻縣屬

安成郡

太平寰宇記

晉宋屬安成郡隋屬宜春郡唐屬袁州

輿地廣記

采渝水為名唐志本作渝天寶後相承為喻

名勝志

南唐昇元中置清江縣割新喻建安鄉入焉

新喻縣志

淳化五年自袁州來隸

宋史志

元貞元年升為新喻州

元史志

明洪武二年復為縣

皇清因之編戶二百六十七里

安志

峽江縣

本新淦縣地漢永元中分置石陽縣吳分置巴邱縣俱屬豫章至隋皆省入新淦明置峽江鎮巡簡司於巴邱故城嘉靖五年以盜賊出沒知府錢琦建議立縣

名勝志

按費宏峽江縣記云臨江所領縣惟新淦最大環

其境數百里蓋兼古巴邱石陽二廢邑之地而有之自成化改元以來往往以分地設縣為請中更多故寢而弗行及嘉靖甲申巡撫御史秦鉞陶儼以前議申請於朝得允賜名峽江

皇清因之編戶一百七十六里

安志

吉安府

春秋時百越地漢屬豫章郡

輿地廣記

靈帝末揚州刺史劉遵上書請置廬陵鄱陽二郡獻帝

初平二年始立郡

雷火宗豫章記

吳分豫章之新喻宜春廬陵之平都永新長沙之安成

萍鄉六縣為安成郡

太平寰宇記

晉太康中移郡於石陽今舊州東北故城是也

元和郡縣志

平陳置吉州大業初復置廬陵郡

隋書志

武德五年置吉州領廬陵新淦二縣七年廢潁州以安

福縣來屬八年廢南平州以太和縣來屬天寶元年改

為廬陵郡乾元元年復為吉州

唐書

南唐割據州仍舊名

寰宇通志

宋置吉州軍屬江南西道

吉安府志

至元十四年陞吉州路總管府置欽事司領一司八縣
元貞元年吉水安福太和永新四縣陞為州改吉州為

吉安路

元史志

洪武元年改路為吉安府仍以安福吉水太和永新為

縣領縣九

嘉靖通志

皇清因之

安志

金方里月
卷二
廬陵縣

附郭本漢舊縣屬豫章郡

郡縣釋名

莽曰桓亭

漢書

吳孫策改為石陽縣分置廬陵郡晉宋因之後復改石

陽為廬陵縣

輿地廣記

大業三年又改為廬陵郡唐武德五年江左平改置吉

州領廬陵縣

太平寰宇記

永淳元年移於今所

唐書志

按廬陵在秦西漢當從邑在東漢三國後當從郡
自唐永淳徙吉州治於今所而廬陵之名始專屬
邑

南唐保大八年割廬陵水東十一鄉置吉水縣

廬陵縣志

宋元明仍舊

皇清因之編戶六百里

安志

泰和縣

漢為廬陵縣地屬豫章郡

太平寰宇記

吳置東昌西昌二縣晉宋皆屬廬陵郡

輿地廣記

平陳置西昌十一年省東昌入更名太和

隋書

武德五年置南平州領太和永新廣興東昌四縣八年

廢南平州以永新等三縣併太和

唐書

南唐保大元年析縣四鄉入龍泉場尋升為縣宋熙寧

四年析縣誠信鄉六堡置萬安縣

秦和縣志

元貞元年升太和州

元史志

縣自漢時得名廬陵繼升廬陵為郡而改縣為太和以

其地產嘉禾故也

明蕭執洪武志序

洪武中復為縣改太為泰

嘉靖通志

皇清因之編戶二百四十二里

安志

吉水縣

本吉陽縣地吳置晉宋屬廬陵郡

輿地廣記

隋開皇十年廢吉陽縣入廬陵縣

太平寰宇記

南唐保大間割廬陵十一鄉置吉水縣宋因之

寰宇通志

宋至和元年割縣五鄉置永豐縣紹興二十一年復割

遷鶯鄉以益永豐

吉水縣志

贛水下流與永豐江水合曲折於灘洲間狀若吉字吉

安吉水皆由此名也

郎縣釋名

元貞元年陞吉水州

元史志

明復為縣

嘉靖通志

皇清因之編戶四百三十一里

安志

永豐縣

本漢廬陵地吳即其地立陽城縣晉太康元年改曰陽

豐隋并入廬陵

名勝志

至和元年十月詔以吉州吉水五鄉為永豐縣以昔之

報恩鎮為之治所

段維新建永豐縣記

宋紹興十八年置樂安縣於撫州乃割縣之雲蓋鄉以

屬之

永豐縣志

元明仍舊

皇清因之編戶三百二十九里

安志

安福縣

本漢安平安成二縣地安平屬豫章郡安成屬長沙國

名勝

志

安平侯國莽曰安寧安成莽曰思成

漢書注

漢永元中改安平縣為平都縣吳寶鼎二年置安成郡

而縣屬焉

太平寰宇記

晉改縣曰安復宋齊梁陳因之

輿地廣記

舊置安成郡平陳郡廢縣改曰安成十八年又曰安復

隋書

志

武德中改為安福縣

元和郡縣志

元貞元年升安福州

元史志

洪武二年復改為縣

安福縣志

皇清因之編戶二百三十六里

安志

龍泉縣

漢廬陵縣地吳立為新興縣晉曰遂興隋并入太和

寰宇

通志

本吉州太和縣龍泉鄉什善鎮地南唐保大元年析置

龍泉場以鄉為名宋顯德七年升為縣

太平寰宇記

宋熙寧四年割縣之萬安鎮置萬安縣

龍泉縣志

邑有龍泉江故宋又名泉江縣

郡縣釋名

紹興初復曰龍泉元明仍舊

皇清因之編戶六十三里

安志

萬安縣

本孫吳新興縣地晉為遂興縣地隋省入太和

寰宇記

楊吳時置萬安鎮

名勝志

熙寧四年以龍泉場萬安鎮置萬安縣

宋史志

吉州萬安古遂興之地南唐始立鎮闢地向南得石符一帙有漢八分書云地界兩川神秀所蟠更為都邑萬

民以安遂曰帥府秉其字義為萬安焉

胡銓萬安縣廳壁記

元明仍舊

皇清因之編戶六十六里

安志

永新縣

本漢廬陵縣地吳歸命侯所置屬安成郡隋開皇中廢

元和郡縣志

唐武德五年析太和之地置南平州復立永新縣以隸焉八年州廢入太和顯慶四年永新民以太和道路阻遠請列置縣於永水東南即今理也

太平寰宇記

宋仍唐故元祐七年割太和行鄉三堡地來屬

永新縣志

元貞元年升永新州至順間分永新州立永寧縣

元史志

洪武二年改永新州仍為縣

嘉靖通志

皇清因之編戶一百八十四里

安志

永寧縣

本永新州之勝業鄉元至順初守土官以鄉去州城道

險而遙民罷征役乞別置縣從之

名勝志

永寧縣長寧之義也

郡縣釋名

明仍其舊

皇清因之編戶四十二里

安志

撫州府

春秋百越之地戰國屬楚秦屬九江郡

輿地廣記

漢立南昌縣後漢分南昌立臨汝縣吳太平二年分豫

章之臨汝南城縣立臨川郡即今州也

十道志

平陳置撫州大業三年復置郡

隋書志

時總管楊武通奉使安撫即以撫為州名

太平寰宇記

武德五年平林士弘置撫州領臨川南城邵武宜黃崇

仁永城東興將樂縣七年省東興永城將樂三縣以邵

武隸建州八年省宜黃縣天寶元年改臨川郡乾元元

年復為撫州

唐書

書

五代時楊吳置昭武軍節度宋仍為撫州隸江西路

豫章

建炎四年隸江南路紹興四年復來隸

宋史志

至元十四年升撫州路總管府

元史志

明初改為撫州府領縣五正德八年東鄉盜平奏割臨川進賢等五縣地建東鄉縣領縣六

皇清因之

安志

臨川縣

附郭本漢豫章郡南城縣地

寰宇通志

臨汝永元八年置

後漢書郡國志

吳太平二年以臨汝縣為郡於郡南更置西平縣晉改為西豐縣梁大通二年分臨川北境置定川縣隋開皇九年并西豐定川二縣入臨川縣

太平寰宇記

以臨水汝水為名梁置定川縣即臨水也

名勝志

晉以後並因之隋置撫州改臨汝為臨川縣唐因之

輿地

廣記

宋元明仍舊

皇清因之編戶六百二十五里

安志

崇仁縣

本後漢臨汝縣地吳太平二年分臨汝為新建縣屬巴山郡梁大同二年分巴山郡之新建西寧二縣立臨川

郡 太平寰宇記

梁置巴山郡領七縣平陳郡縣並廢置崇仁縣

隋書志注

開皇九年改臨川郡為撫州崇仁縣隸焉又廢宜黃安

浦二縣合入崇仁縣唐貞觀八年以巴山縣偏僻并入

崇仁即今理

太平寰宇記

紹興中割潁秀惠安二鄉隸崇仁而豐安屬崇仁即今

之西館市

吳康齋豐安程氏族譜序

縣有崇仁鄉因鄉名也

郡縣釋名

元明仍舊

皇清因之編戶二百五十五里

安志

金谿縣

本臨川縣上幕鎮其山崗出銀礦唐朝常為銀監至周顯德五年析臨川近鎮一鄉并取饒州餘干白馬一鄉

立金谿場復置爐以烹銀礦

太平寰宇記

開寶五年陞金谿場為縣

宋史志

金谿縣因金谿場名也唐時有銀礦發其地作場以冶之曰金谿場寶厯乙巳銀絕而冶廢宋開寶初始置縣

元虞集

道園集

縣有金谿水在上幕嶺東水色如金縣因以名

郡縣釋名

按金谿改場為縣舊志及通考皆云淳化五年宋史則載開寶五年虞集二孝女贊亦曰宋開寶初始置縣斷以史為據

元明仍舊

皇清因之編戶二百一里

安志

宜黃縣

本臨川縣地梁大同二年置巴山郡因立宜黃縣於宜黃水側以水為縣名隋開皇九年廢并入崇仁

太平寰宇記

武德五年析置宜黃縣八年省

唐書志

開寶八年以宜黃場復置

輿地廣記

南唐後以崇仁之仙桂崇賢待賢三鄉立宜黃場

名勝志

縣治舊為黃填鎮宋以前分隸不一

明譚綸宜黃城記

宜黃亦名宜川

明王英崇陰八景詩序

元明仍舊

皇清因之編戶七十二里

安志

樂安縣

宋會要云樂安縣紹興十九年江西諸司奏以崇仁疆土闊遠山嶺重複盜賊出沒不時請析本縣及永豐二

縣間地析置從之

名勝志

縣有樂安鄉故名

郡縣釋名

元明仍舊

皇清因之編戶二百三十二里

安志

東鄉縣

本臨川進賢餘干安仁之遠鄒正德八年始置縣以地

居府之東偏故名

名勝志

東鄉者臨川之東鄉也

明田汝村建東鄉學記

弘治末年東鄉民趙顯詣闕陳建縣之宜疏入下有司

議巡撫林俊以憂去不果建盜日益熾至正德八年總

制陳金兵道胡世寧平姚源華林賊乃取孝岡地域之

為東鄉縣隸撫州

東鄉縣志

皇清因之編戶六十四里

安志

江西通志卷二